

Visoki predstavnik upozorio UN o rizicima u provođenju reformi u BiH

Visoki predstavnik, Paddy Ashdown, obratio se u srijedu Vijeću sigurnosti Ujedinjenih naroda u New Yorku, nakon razgovora koje je u utorak održao sa Generalnim sekretarom UN-a Kofi Annanom i podsekretarom za mirovne operacije UN-a Jean Marie Guehenno.

Visoki predstavnik je izvijestio Vijeće sigurnosti o napretku koji je ostvaren u reformama u oblasti odbrane, obavještajnog sektora, carina, indirektnog oporezivanja i Grada Mostara, konstatirajući efikasnost prilično nepolitičkog i praktičnog pristupa kojim su se vodile komisije za provođenje ovih reformi, te je skrenuo pažnju na dvojaki zadatak koji se sada nalazi pred organima vlasti BiH – da provedu reforme koje će BiH omogućiti članstvo u programu Partnerstvo za mir kao i otpočinjanje pregovora o potpisivanju Sprazuma o stabilizaciji i pridruživanju sa Evropskom unijom.

Visoki predstavnik je, međutim, upozorio da je sadašnji tempo reformi suviše spor za ispunjavanje uslova za članstvo u Partnerstvu za mir do samita NATO saveza koji će se u junu održati u Istanbulu, ili za ispunjavanje 16 ključnih preduslova, koje je postavila Evropska komisija, do kraja juna. Visoki predstavnik je također ukazao na "obeshrabrujuće dokaze" da se predstojeći izborni period neće karakterizirati obnovljenim koncentriranjem napora na provođenju reformi, "već povratkom na staru praksu agresivne politike o ugroženosti naroda koja pruža, naročito nacionalističkim strankama, najbolju mogućnost da popune svoje glasačke kutije."

Visoki predstavnik je nadalje upozorio da određene grupe vode kampanju protiv procesa uspostavljanja neovisnog i

profesionalnog pravosuđa u BiH, te da bi ovo moglo dodatno usporiti proces reformi i integriranje BiH u Euroatlantske strukture. Na sastanicima koje je održao sa predstavnicima UN-a prethodnog dana, visoki predstavnik je naglasio da ova kampanja sada predstavlja najveću prijetnju procesu uspostavljanja istinski multietničkog i neovisnog pravosuđa u BiH, jer ista obeshrabruje kvalifikovane sudije da se prijave za rad u pravosuđu. Naročito, od kada je ova kampanja otpočela, postalo je sve teže pronaći kvalifikovane sudije, koji nisu srpske nacionalnosti, da se prijave na pozicije u Republici Srpskoj.

Visoki predstavnik je također odao počast doprinosu koji je preminuli Sven Frederiksen dao ključnom zadatku reforme policijskih snaga u BiH. Također je skrenuo pažnju Vijeća sigurnosti UN-a na činjenicu da će Ujedinjeni narodi morati razmotriti kako da riješe sve veći broj prigovora na proces certifikacije pripadnika policijskih snaga koji predvodi UN.

Visoki predstavnik je govorio i o napretku ostvarenom u oblasti vladavine zakona i ekonomskih reformi, te je zaključio da je unatoč trenutnom sporom tempu reformi, "BiH na putu da postane održiva država zahvaljujući kontinuiranom, nesebičnom opredjeljenju međunarodne zajednice i, iznad svega, običnim građanima BiH," te je zatražio od UN-a i međunarodne zajednice da "i dalje nastave sa ovakvim opredjeljenjem i završe posao."